

Ripuarisch

Van Wikipedia

Dit artikel is gesjreve in 't Mestreechs. Ómdat 't plaatsgebóng is, maogs doe 't ómzètte nao 't Kirchröadsj, es te dit dialek sjpriks.

't **Ripuarisch** is de samevattende term veur de Middel frankische dialekte die veurnaomelek in 't zuie vaan de Duitse staot Noordrien-Wesfale gesproke weure, en ziech oonder mie kinmèrke door twietoenigheid, wie 't Limburgs. Me kint daodoor 't Ripuarisch es 't Middelduits breurke vaan 't Limburgs zien. 't Hoofdialek vaan 't Ripuarisch is zeker 't Kölsj, 'n ander groet dialek is 't Óchesj. In 't uterste zuidooste vaan Nederlands Limburg, te weite in Kèrkraoj, Bóches, Zumpelveld, Lemieësj en Vóls, vint me ouch Ripuarische dialekte, wie ouch in 't noorde vaan Neubelgien (Eupe en omgeving).



't Ripoarisch dialekgebeed in blauw

De grens mèt 't Limburgs weurt gevörmp door de Benrather Linie - dit is 'n sterke isoglosse. Toch zien vööl Ripuarische dialekte veur Limburgers good te verstoon. De verwantsjap tösse de bei taole kump door de Kölse expansie: d'n export vaan taolelemente oet 't dialek vaan Kölle nao 't weste, vaanwege 't aonzeen vaan die stad. 't Zuidooslimbörgs, boe dialekte wie 't Heëlesj en Eupener bij hure, heet bezunder vööl invloed vaan 't Ripuarisch ondergaange (zuug ouch: Ripuarisch-Limburgs).

De belaankriekste kinmerke zien 't consequent verandere vaan de Aajdgermaanse *-k* nao 'ne klinker in *-ch*: me zeet hei neet allein *ich* en *ooch*, meh ouch *maache*. De *-t* en *-p* zien allein in bepaolde posities veranderd: *losse* (veur *laote*) en *tsied* (veur *tied*), meh *dat*; *róffe* (veur *rope*), meh *appel* en *pónd*. De Aajdgermaanse *ai* en *au* zien gemonoftongiseerd tot *ee* en *oo*, wie in 't Nederlands en Nedersaksisch, meh in tegestèlling tot 't Standaardduits en tot vööl Limbörgse dialekte. Lang vocaole zien dèks verkort, wienie 'ne consonant drop volg (zuug bovestoonde veurbeelder *losse* en *róffe*).

Veurbeeld

Dit zint twee Maarten-leder die in Bonn weure gezonge, weergegeve eerst in Duutsje en dan in Limburgsje sjriefwies.

<p>Zint Mäthes ess att widder hee. Looft, Kinder, looft! Wenn hä uns rōf: mir sinn att hee. Looft, Kinder, looft! Met de Lööch en de Hand On dat Kätzje aanjebrannt On de Stroß erop on eraff: Looft, Kinder, looft!</p>	<p>Tsint Maetes és at widder hee. Looft, kinder, looft! Wen hae oens reuf: mier zin at hee. Looft, kinder, looft! Mét de läöch én de hand Ón dat kaets'je aanjebrant Ón de sjtraos eróp ón eraf: Looft, kinder, looft!</p>
---	---

Dä hellije Zint Mäthes,
Dat wor ne jode Mann.
Dä jov de Kinder Kätzje
On stooch se selver an.
Butz-butz-fidebutz,
Dat wor ne jode Mann!

Dae hellije Tsint Maetes,
Dat waor ne jode man.
Dae jaof de kinder kaets'je
Ón sjtaoch ze zelve an.
Boets-boets-fiedeboets,
Dat waor ne jode man!

Zuug ouch

- [Kirchröadsj](#)

Externe link

- [Wikipedia op Ripuarisch \(https://ksh.wikipedia.org\)](https://ksh.wikipedia.org)

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=Ripuarisch&oldid=414221>"

Dees pazjena is 't lèts verangerd op 10 apr 2017, 11:12.

De teks is besjikbaar ónger de [Creative Commons Naomsvermelding/Geliek Deile licentie](#). 't Is mäögelik dat aanvöllende veurwaarde van toepassing zeen. Betrach de [Algemein veurwaarde](#) veur mie informatie.